

戊 6

49

周禮醫官詳說

幼臣署



周禮醫官
詳說

李公純署



序

醫學之由來不自周始也神農辨藥性著本草經黃帝與岐伯鬼區臾等問答著內經素問及靈樞經此皆有記載可考所誌岐伯鬼區臾等人或者即古之醫官伊尹巫咸有湯液治病之法其書不傳僅聞其說夫尹咸爲成湯之相臣諸於藥性能以湯液治病則亦可稱醫官然則醫亦豈至周而始列爲官哉周禮醫師掌醫之釐令所云疾醫瘍醫食醫獸醫莫不各有專司大抵以上士中士下士分其等級第旣概屬之醫師不妨概稱爲醫官醫縱非至周而始爲官而醫官之設亦何必不於周而始顯哉顧詠植先生學博才高著醫官詳說一書援引諸家名論附以己之案語精釋醫理其所云實事求是之處乃專爲醫學發明而非欲作醫官之考据也書成來問序於余余不敏素不知醫而竊喜是書之講求醫

學尋原推本正大有裨於醫也而益欽古人醫學之重命之
官猶垂訓之如是其詳且盡也而先生以通經之才通醫尤
足令世之業醫者玩索焉而知醫學之源流庶幾哉體古人
慎疾之衷而慎醫術也不揣固鄙聊書數語歸之未知於先
生之意果有當否光緒癸巳秋七月天南遯叟王韜識

周禮醫官詳說

武進顧成章詠植著

更名
編案

周之醫官猶今之太醫院也其法最古其制最精而其義實與內經相表裏但後來治經者罕習醫業醫者罕窮經門戶扞格隱若歧途歷代諸經師雖各有解說而望文生訓究於醫理鮮有當也成章自丙戌困於疾越三歲乃瘳疾中講求醫學尋源推本周禮醫官實爲後世醫學之祖爰輯衆說復參以己意名曰詳說以期實事求是云爾光緒癸巳春二月顧成章詠植氏記

醫師上士二人下士四人府二人徒二十人

鄭氏康成注醫師之長 賈氏公彥疏醫亦有齊和飲食之類故設在飲食之間

陳氏龍標曰天官自宰夫而下首列宮官所以擁衛王宮而防肘腋之變次列食官所以保護王躬而全性命之正次列醫官所以調和王體而弭陰陽之患皆官之至要者也且人飲食失節則多致疾病故自庖人等官而下卽以醫師繼之食疾瘍獸四醫皆其屬也

惠氏士奇曰酒正四飲漿人六飲皆有醫醫者古之湯液今之酒漿也故漿人掌之酒正辨焉說文醫治病工毆者惡姿也得酒而使一曰毆病聲酒所以治病周禮有醫酒郊祀志順風作液湯如淳曰藝文志有液湯經其義未詳愚案內經黃帝問曰上古聖人作湯液醪醴爲而不用何也岐伯曰古聖人之作湯液醪醴者以爲備耳故爲而弗服也中古之世道德稍衰邪氣時至服之萬全當今之世必齊毒藥攻其中鑱石鍼艾治其外形弊血盡而功不立

然則古之治病未有毒藥鍼石先有湯液酒醴故謂之醫
毆者噫也病者善噫故人身有噫噫穴在背下俠脊旁三
寸所厭之令病者呼噫噫噫應手言以手應之病者作
聲則止噫一作醴莊子曰生者嗜醴物也亦作意漢書意
烏注云恚怒聲古以酒治病遂以名其酒故醫醴皆从酉
以毆意得聲康成以醴爲梅漿失之矣

醫師掌醫之政令聚毒藥以共醫事

鄭注毒藥藥之辛苦者藥之物恒多毒孟子曰若藥不瞑
眩厥疾不瘳賈疏細辛苦參雖辛苦而無毒但有毒者
多辛苦故云毒藥藥之辛苦者藥中有毒者謂巴豆狼牙
之類無毒者謂人參芎藭之類藥之無毒亦聚之直言聚
毒藥者以毒爲主

成章謹案疾醫職云以五味五穀五藥養其病明治疾者

止言藥而不言毒也瘍醫職云凡療瘍以五毒攻之以鉅藥療之明治瘍者先用毒以治其外兼用藥以治其內也醫師兼統疾醫瘍醫故兼聚疾醫瘍醫所用之物是則毒與藥當分爲二物明矣鄭君誤以爲一已非經旨賈疏以毒爲主尤誤矣

凡邦之有疾病者疔瘍者造焉則使醫分而治之

鄭注疔頭瘍亦謂禿也身傷曰瘍分之者醫各有能賈

疏瘍醫腫瘍等不言疔此特言疔者腫瘍等可以兼之故云疔頭瘍禿含膿血者則入疔中禿而不含膿血者疔中可以兼之故云亦謂禿也疾醫知疾不知瘍瘍醫知瘍不知疾故云醫各有能

成章謹案唐石經作有疔瘍者與宋王與之周禮訂義同石經考文提要云案下獸醫凡獸之有病者有瘍者亦疊

有字太平御覽疾病部一引此亦疊有字是則今本似當從石經爲是但顧氏炎武嘗以有字爲多不爲無見何者

唐韻集韻韻會皆云七古文化字易繫辭擬議以成其變

化大宗伯篇合天地之化鄭注能生非類曰化釋名火化

也消化物也然則疔从疔七聲今注疏作七傳寫誤也明有疾病者

化爲瘍卽有內症者化爲外症也且本經云凡邦之有疾

病者疔瘍者造焉句法與下凡獸之有病者有瘍者疊用

有字不同此明是內有疾病者變化爲外瘍症也不然有

疾者造疾醫而巳有瘍者造瘍醫而巳復何容造醫師哉

不造疾醫瘍醫而造醫師是先待醫師分其內病外瘍之

輕重而後當或使疾醫或使瘍醫分而治之耳不然諸醫

旣以醫師爲統則就獸醫者獨何以不造醫師哉就獸醫

者不造醫師明不就疾醫瘍醫而就醫師者是必兼內外

兩症者也鄭說疖頭瘍亦謂禿不過是身之一端耳一端可舉則耳目手足口腹之病將曷勝舉哉

又案妣籀文作妣妣或體作妣明匕是匕之通用字故許君曰匕相與比叙也然則比何義乎曰儀禮大射儀其容體比於禮其節比於樂鄭注比親合也禮樂記比物醜類孔疏謂以同類之事相比方漢劉歆移太常博士書比意同力師古注亦訓合此疖字从疾匕聲明有疾病者合同外瘍之症也

歲終則稽其醫事以制其食十全爲上十失一次之十失二次之十失三次之十失四爲下

鄭注食祿也全猶愈也以失四爲下者五則半矣或不治自愈賈疏食卽月俸依序官疾醫中士瘍醫下士王制下士視上農夫食九人祿中士倍下士十八人祿若然中

士祿食有常今差爲五等功適中者守本祿功高者益之
功下者損之欲勉勵醫者故爲此五等之差

食醫中士二人

鄭注食有和齊藥之類

食醫掌和王之六食六飲六膳百羞百漿八珍之齊

鄭注和調也 賈疏此等並是膳夫所掌食醫調和而已

圉膳夫職云食用六穀膳用六牲飲用六清羞用百二

十品珍用八物醬用百有二十饔 鄭注六牲馬牛羊豕

犬雞也羞出於牲及禽獸以備滋味謂之庶羞公食大夫

禮內則下大夫十六上大夫二十其物數備焉天子諸侯

有其數而物未得盡聞珍謂滫熬滫母炮豚炮牂檮珍積

熬肝膋也醬謂醯醢也王舉則醢人共醢六十饔以五齎

七醢七菹三醢實之醢人共齎菹醢物六十饔鄭司農云



羞進也六穀稌黍稷梁麥苽六清水漿醴醕醫醢 賈疏

醬是摠名醬中兼有醢醢經云百有二十齏醢人共醢

十齏醢人共醢物六十齏故鄭注醢人兼引之

成章謹案六食卽司農云稌黍稷梁麥苽也此爲下爲

目故知六食六膳卽下文之牛宜稌羊宜黍豕宜稷犬宜

梁雁宜麥魚宜苽也六飲卽漿人之水漿醴涼醫醢入於

酒府者也水清水也卽酒正四飲之一曰清禮記夏后氏

尙明水是也漿今之米粥也書武成簞食壺漿以迎王師

可知漿是民家常飲之物且今之黏膩者皆稱漿也醴鄭

注猶醴也成而汁滓相將如今恬卽俗作醴酒此說最塙內則

云稻醴清糟黍醴清糟梁醴清糟明醴爲酒醴是汁之連

糟者今俗冬作酒脰亦曰酒釀其味甚甜灌於甕內至明歲清

明節後去滓煎汁名曰陳酒是則未去滓之酒脰卽酒之

體也醴从體省音義可通段矣涼卽內則所云濫也康威
謂濫以諸和水紀莒之間名諸爲濫管子曰冬日不濫非
愛水也夏日不煬非愛火也爲不適於身便於體也然則
濫之謂涼蓋宜於夏矣楚辭挫糟凍飲酎清凉注謂盛夏
之時覆甕乾釀提去其糟但取清醕居之冰上而飲之則
酒寒涼其說尤爲近是醫酒之浸藥者卽今所謂藥酒也
醴黍醴也內則云或以醴爲醴黍醴玩經文之義恐與稻
醴梁醴相混故或以醴爲醴之下必特明之曰黍醴是醴
爲黍醴之別名也然則黍醴之外有正義乎曰內則取稻
米舉糲漉之小切狼臠膏以與稻米爲醴此是醴之正義
或以醴爲醴黍醴明黍醴借醴爲名是或義也但此在六
飲之內當從黍醴爲正

凡食齊眡春時羹齊眡夏時醬齊眡秋時飲齊眡冬時

鄭注飯宜溫羹宜熱醬宜涼飲宜寒 賈疏言凡者摠與
下四時爲目故言凡以該之言食者卽上六食內則所云
食齊一也眠猶比也言飯之齊和四時常溫比於春時大
羹鉶羹柔羹等其所齊和四時常熱故云眠夏時案醯人
醯人唯有醯醢不言醬卽豆醬也公食大夫公親設醬醬
者食之主言醬則該諸豆實四時皆須涼故言眠秋時醬
人六飲水漿等四時皆須寒故言眠冬時

凡和春多酸夏多苦秋多辛冬多鹹調以滑甘

鄭注各尙其時味而甘以成之猶水火金木之載於土內
則曰棗栗飴蜜以甘之薑荳枌榆兔槁漘漘以滑之 賈
疏各尙其時味者多一分者也必多其時味者所以助時
氣也鄭君注內則荳薑類榆白曰枌晚新生者槁乾也齊
人漘曰漘秦人滑曰漘謂將此薑已下和漘以滑之

成章謹案五味之中多用甘而復相配以滑何也曰甘性緩恐壅滯胃氣姑當配以滑性是一補一瀉之用也凡會膳食之宜牛宜稌羊宜黍豕宜稷犬宜粱雁宜麥魚宜苽

鄭注會成也謂其味相成鄭司農曰稌稷也爾雅曰稌稻苽雕胡也賈疏依本草素問牛味甘平稻味苦而又溫甘苦相成羊味甘熱黍味苦溫亦是甘苦相成豕豬味酸牝豬味苦稷米味甘亦是甘苦相成犬味酸而溫粱米味甘而微寒亦是氣味相成雁味甘平大麥味酸而溫小麥味甘微寒亦是氣味相成魚味寒魚族甚多寒熱酸苦兼有而云宜苽或同是水物相宜苽今南方見有苽米是也王氏引之曰膳夫凡王之饋食用六穀膳用六牲鄭注六牲馬牛羊豕犬雞也鄭司農云六穀稌黍稷粱麥苽也案

此六牲與牧人不同牧人之六牲謂馬牛羊豕犬雞此六牲則牛羊豕犬雁魚也蓋膳夫之食飲膳羞與食醫之六食六飲六膳百羞相應食醫職曰凡會膳食之宜牛宜稌羊宜黍豕宜稷犬宜粱雁宜麥魚宜苽所謂六膳也稌黍稷粱麥苽所謂六食也鄭司農說洵不可易矣雁謂鵠也爾雅舒雁鵠李巡注野曰雁家曰鵠對文則鵠與雁異散文則鵠亦謂之雁方言雁自關而東謂之鴈南楚之外謂之鵠說文鵠雁也雁鵠也莊子山木篇命豎子殺雁而亨之謂殺鵠也齊策士三食不得饜而君鵠鵠有餘食韓詩外傳及說苑尊賢篇並作雁鵠有餘粟晏子春秋外篇亦曰君之鵠雁食以菽粟墨子雜守篇曰寇至先殺牛羊雞狗鳧雁今本鳧作鳥說苑臣術篇秦穆公百里奚之言公孫支歸取雁以賀鵠是常畜之物故漢書翟方進傳有狗從外

入齧其中庭羣雁數十皆謂鵝爲雁也堯典二生

太平御覽引

二牲馬融以二生爲羔雁

見史記五帝紀集解

雁則鵝也史記封禪書

漢書郊祀志並作二牲蓋羔與鵝皆常畜之物故謂之牲也魚亦可畜之池故亦謂之牲大司馬大祭祀饗祀羔牲魚鄭司農曰大司馬主進魚牲昏義曰教成祭之牲用魚管子禁藏篇曰舉春祭塞久禱以魚爲牲輕重己篇曰祭日犧牲以魚是也牛宜稌等猶月令食麥與羊食菽與雞等皆以牲配穀耳鄭未考食醫之文故說之未確王制曰庶人春薦韭夏薦麥秋薦黍冬薦稻韭以卵麥以魚黍以豚稻以雁雁亦謂鵝也大宗伯以禽作六摯以等諸臣孤執皮帛卿執羔大夫執雁士執雉庶人執鵝工商執雞鄭注曰雁取其候時而行案鄭蓋以鴻雁釋之鴻雁春去秋來故曰候時也其實大夫所執之雁直謂鵝耳古者謂鵝